

開放文學－歷代筆記－夷堅丁志 卷第九

太原意娘 京師人楊從善、陷虜在雲中、以乾如□山、飲於酒樓、見壁間留題、自稱太原意娘、又有小詞、皆尋憶良人之語、詔其姓名字畫、蓋表兄韓師厚妻王氏也、自亂離睽隔、不復相聞、細驗所書、墨尚濕、問酒家人、曰、恰數婦女來共飲、其中一人索筆而書、去猶未遠、楊便起追躡及之、數人同行、其一衣紫佩金馬孟、以帛擁項、見楊愕然、不敢公召喚、時時舉目使相從、逮夜眾散、引楊到大宅門外、立語曰、頃與良人避地至淮泗、為虜所掠、其酋撒八太尉者、欲相逼、我義不受辱、引刀自刳不殊、大酋之妻韓國夫人、聞而憐我、亟命救療、且以自隨、蒼黃別、良人不知安往、似聞在江南為官、每念念不能釋、此韓國宅也、適與女伴出遊、因感而書壁、不謂叔見之、乘間願再訪我、儻得良人音息、幸見報揚、恐宅內人出、不敢久留連、悵然告別、雖眷眷於懷、未敢復往、它日、但之酒樓、瞻玩墨跡、忽睹別壁新題字、並悼亡一詞、正所謂韓師厚也、驚扣此為誰、酒家曰、南朝遣使通和、在館有四五人、來買酒、此蓋其所書、時法禁未立、奉使官屬、尚得與外人相往來、楊急詣館、果見韓把手悲喜、為言意娘所在、韓駭曰、憶遭掠時、親見其自刳死、那得生、楊固執前說、邀與俱至、向一宅則闕無人居、荒草如織、逢牆外打線媪、試告焉、媪曰、意娘實在此、然非生者、昨韓國夫人閱其節義、為火骨以來、韓國亡、因隨葬此、遂指示窆處、二人逾垣入、恍然見從廡下趣室中、皆驚懼、然業已至、即隨之、乃韓國影堂、傍繪意娘像、衣貌悉曩所見、韓悲痛還館、具酒餼作文祭酹、欲挈遺孀歸、拜而祝曰、願往不願往、當以影響相告、良久出現、曰、勞君愛念、孤魂寓此、豈不願有歸、然從君而南、得常常善視我、庶慰冥漠、君如更娶妻、不復我顧、則不若南之愈也、韓感泣、誓不再娶、於是竊發塚裏骨歸、至建康、備禮卜葬、每旬日輒往臨視、後數年、韓無以為家、竟有所娶、而於故妻墓稍益疏、夢其來、怨恚甚切、曰、我在彼甚安、君強攜我、今正違誓言、不忍獨寂寞、須屈君同此況味、韓愧怖得病、知不可免、不數日卒、

許道壽

許道壽者、本建康道士、後還為民、居臨安太廟前、以鬻香為業、仿廣州造龍涎諸香、雖沉麝箋檀、亦大半作偽、其母寡居久、忽如妊娠、一產二物、身成小兒形、而頭一為貓、一為鴉、惡而殺之、數日間母子皆死、時隆興元年、

滕明之

臨安人滕明之、初為諸司吏、坐事失職、無以養妻子、乃為人管乾官爵差遣、規取其贏、且好把持人語言短長、求取無度、識者畏而惡之、紹興丁卯之秋、告其妻曰、吾適夢至望仙橋、入馬胎中、驚但而寤、此何祥也、即得疾死、死之夕、家人皆聞馬嘶聲、妻後亦流為倡雲、

西池游

宣和中、京師西池春遊內酒庫吏周欽、倚仙橋欄檻、投餅餌以飼魚、魚去來游泳、觀者雜沓、良久皆散、唯一婦人留、引周裾與言、視之、蓋舊鄰賣藥駱生妻也、自徙居後、聲跡不相聞、見之喜甚、問良人安在、顧頰曰、向與子鄰時、彼謂我私子、子既徙去、猶屢辱我、我不能堪、與之決絕、今寓食阿姨家、聞子已喪偶、思欲遣媒妁言議而未及、不料獲相逢於此、周愈喜、即邀入酒肆、草草成約、納為妻、逾數月、因出城回、買飯於市、駱生適負藥笈過門、周以娶其出婦之故、羞見之、掩面欲避、駱遽入相揖、周勉與語、且詢其室家、駱傷惋曰、首春病疫死矣、吾如失左右手、悲念之不忘、遂泣下、周寬譬使去、殊大驚、又疑駱諱前事而為之說、立詣舊居、訪鄰里、皆言駱妻死、明白曰、吾屬皆送葬者也、周益自失、懼不敢還家、又不知所為、縱飲酒壚醉、就睡、迨夜乃出、信步行、茫無所之、值當道臥者絆而僕、沾濕滿身、復起行、財數十步、聞連呼殺人、邏卒躡尋、見周意狀蒼忙、而汚血被體、共執送官、具說蹤跡如此、竟不能自明、掠死於獄、而真盜逸至京東、以他過敗獲、具言都城殺人事、移牒開封、則周既死矣、可謂奇禍也、其子子明、亦坐惡逆誅、

舒懋育鯁鱗

臨安浙江人舒懋、以賣魚飯為業、多育鯁鱗甕器中、旋殺旋烹、一日發甕失所蓄、遍尋之、乃悉緣著屋壁、累累欲上、而無所屆、繚繞糾結可畏、懋甚懼、取投諸江、誓不復殺、而易為蔬饌、經數月、所入殊薄、不足以贍家、乃如其故、俄又失二物所在、因汲水見密蟠井中、不暇顧省、拾取而烹之、時幹道五年春也、及秋疫作、盡室皆死、懋獨不然、但遍身生瘡、每瘡輒有鯁鱗頭喙突出、痛楚特甚、後一月乃死、

陳媳婦

宣和四年、京師鬻果小民子、夜遇婦人、豔妝秀色、來與語、邀至一處、相與燕狎、頗得衣物之贈、自是夜夜見之、所獲益多、民服飾驟鮮華、而容日羸悴、豎巫不能愈、有禁衛典首劉某、持齋戒不食、但啖乳香飲水、能制鬼物、都人謂之吃香劉太保、民父母偕往狼祈、劉呼視其子曰、此物乃為怪耶、吾久疑其必作孽、今果爾、即共造產科醫者陳媳婦家、陳之門刻木為婦人、飾以衣服冠珥、稍故暗則加彩繪、而更新其衣、自父祖以來有之、不記歲月矣、劉揭其首幕、令民子視之、則宛然夜所見者、乃就其家設壇位、步 (正) 作法、舉火四十九炬焚之、怪遂絕、

河東鄭屠

臨安宰豬、但一大屠為之長、每五鼓擊殺於作坊、須割裂既竟、然後眾屠兒分挈以去、獨河東人鄭六十者、自置肆殺之、嘗掛肉於案鉤上、用力頗銳、鉤尖利甚、傷其掌、刃透手背、痛逾月方愈、又臨灶燂豬、恍若有物挽捩入大釜中、妻子急拯之、半身煮爛死矣、

張顏承節

宣和間、京師天漢橋、有官人自脫冠巾、引頭觸欄柱不已、觀者環視、恍莫測其由、不復可勸止、問亦不對、良久血肉淋漓、冥僕於地、徼巡卒共守伺之、日晚小蘇、呻吟悲劇、顧曰、我張顏承節也、住某坊內、幸為僦人舁歸、既至家、遂大委頓、頭顱腫潰如盎、呼醫傳藥、累旬方小愈、家人扣其端、全不自覺、瘡成痂而癢不可忍、勢須盡爬搔則又腫潰、才愈復癢、如是三四反、逾年不差、殆於骨立、盡室憂其不起、嘗扶掖出門、適舊僕過前、驚問所以、告之故、僕曰、都水監杜令史、施惡瘡藥絕神妙、然不可屈致、當勉詣彼、庶見證付藥、可立愈、張仗僕為導、亟訪之、杜生屏人曰、頗憶前年中秋夜所在乎、曰、忘之矣、杜曰、吾能言之、君是年部江西米綱、以中秋夕至獨樹灣檣泊、月色正明、君杖策登岸、百步許得地平曠、方命酒賞月、俄而驟雨、令僕夫取雨具、怒其來緩、致衣履沾濕、拋所執拄斧擲之中額、僕回舟謂妻曰、我為主公所擊、已中破傷風、恐不得活、然無所赴懇、即死、汝切勿以實言、但云痼疾發作、此去鄉遠、萬一不汝容、何以生存、宜狠白主公、乞許汝子母、附舟入京、猶得從人浣濯以自給、言終而亡、比曉、妻舉屍、瘞於水濱、泣拜君曰、夫不幸道死、願容附載、君叱之曰、舟中皆男子、豈宜著汝無夫婦人、略不顧、促使解纜、妻拊膺大慟曰、孤困異土、兼乏裹糧、進退無路、不如死、抱幼子自投江中、僕既殞於非命、又痛妻兒之不終、訴諸幽府、許償此冤、去年君觸橋時、乃彼久尋君而得見也、張震駭曰、是皆然矣、某方欲丐藥、何為及此、且何以知之、杜曰、吾畫執吏役、夜直冥司、職典冤獄、茲事正在吾手、屢為解釋、渠不聽從、自今四十九日、當往與君決、至期、可掃灑靜室、張燈四十九盞、置高坐以待之、中夜當有所睹、幸而燈不滅、彼意尚善、若滅其半、則不可為矣、吾亦極力調護、但負命之冤、須待彼肯捨與否、有司固不可得而強、無用藥為也、張泣謝而歸、如其教、張燈之夕、獨坐高榻、家人皆伺於幕內、近三鼓、陰風勁厲、四十九燈悉滅、其一復明、亡僕流血被面、妻子相隨、猶帶水瀝瀝、從室隅出、拽張曰、可還我命、即隕墜於下、頭縮入項間而死、

龍澤陳永年

幹道三年秋·臨安大雷震·軍器所作坊兵龍澤夫婦·並小兒曰郭僧·凡三人·震死於一室·初澤父全既死·澤妹鐵師·居白龜池為娼·其母但處女家·遇子受俸米·則來取三斗去·澤夫婦頗厭其至·屢出惡言·郭僧者·亦相與罵侮·以乞婆目之·故獲此譴·同時有嚴州人陳永年·同其兄開銀鋪於臨安市·狂游不檢·母私儲金十數兩·規以送終·恐永年求取無度·不使知·一日開篋·永年適自外來·見之·遽覆而走·母恚悶僕絕·兄追及爭奪·僅得其半·以歸母·母遂病臥·是夕·永年亦遭震厄·

錢塘潮

錢塘江潮·八月十八日最大·天下偉觀也·臨安民俗·太半出觀·紹興十年秋前二夕·江上居民或聞空中語曰·今年當死於橋者數百·皆凶淫不孝之人·其間有名而未至者·當分遣促之·不預此籍·則斥去·又聞應者甚眾·民怪駭不敢言·次夜·跨浦橋畔人·夢有來戒者雲·來日勿登橋·橋且折·旦而告其鄰數家·所夢皆略同·相與危懼·比潮將至·橋上人已滿·得夢者·從傍伺之·遇親識立於上者·密勸之使下·咸以為妖妄不聽·須臾潮至·奔洶異常·驚濤激岸·橋震壞入水·凡壓溺而死數百人·既而死者家來·號泣收斂·道路指言其人·盡平日不逞輩也·乃知神明罰惡·假手致誅·非偶然爾·

陝西劉生

紹興初·河南為偽齊所據·樞密院遣使臣李忠·往間諜·李本晉人·氣豪好交結·人多識之·至京師·遇舊友田庠·庠·亡賴子也·知其南來·法當死·捕告之·賞甚重·輒持之曰·爾昔貸我錢三百貫·可見還·李忿怒曰·安有是·吾寧死耳·陝西人劉生者·聞其事·為李言極知庠不義·然君在此如落窰中·奈何可較曲直·身與貨孰多·且敗大事·盍隨宜餌之·李猶疑其為庠遊說·然亦不得已與其半·劉曰·勿介意·會當復歸君·李佯應曰·幸甚·庠得錢買物·將如晉絳·劉曰·我亦欲到彼·偕行可乎·即同涂·過河中府·少憩於河灘·兩人各攜一擔僕·共坐沙上·四顧無人·劉問庠鄉里年甲·具答之·劉曰·然則汝乃中國民·嗜食宋朝水土矣·庠曰·固然·劉曰·我亦宋遺民·不幸淪沒偽土·常恨無以自效·朝廷每遣人探事·多彩道聽塗說·不得實·幸有誠慤如李三者·吾曹當出力助成之·奈何反挾持以取貨·庠諱曰·是固負我·劉曰·吾素知此·且詢訪備至·甚得其詳·吾與汝無怨惡·但恐南方士大夫·謂我北人皆似汝·敗傷我忠義之風耳·遂運斤殺之·僕亦殺其僕·投屍於河·並其物復回京師·盡以付李·乃告之故·李欲奉半直以謝·劉笑曰·我豈殺人以規利乎·長揖而別·李南還說此·而失劉之名·為可惜也·

要二逆報